



**Siverth K. Heilmann**

**15. 10. 2019**

**Atassut**

**UKA 2019/47\_133**

**Imminut pilersorneq nunatsinni annertusarniarlugu Naalakkersuisut periusissiamik kingusinnerpaamik UKA2020-imi Inatsisartunut saqqummiunneqartussamik suliaqaqqullugit peqquneqarnissaannik Inatsisartut aalajangiiffigisassaattut siunnersuut. Periusissiaq aamma inatsisitigut aningaasatigullu aporfiit nutartigassat aaqqissuuteqqinnissaannut innersuussutinik imaqassaaq.**

(Inatsisartunut ilaasortaq Múte B. Egede, Inuit Ataqatigiit)

**Najukkani nunalerinikkut tunisassianik tuniniaanerup annertusarneqarnissaanut atugassarititaasut pitsaanerpaajunissaat qulakkeerniarlugu Naalakkersuisut iliuusissatut pilersaarusiornissamik peqquneqarnissaannik Inatsisartut aalajangiiffigisassaattut siunnersuut. Siunissami sulinissamut piffissalersuummik iliuusissatut pilersaarut imaqassaaq Inatsisartunullu kingusinnerpaamik UKA 2020-mi agguanneqassalluni.**

(Inatsisartunut ilaasortaq Stine Egede, Inuit Ataqatigiit)

Inatsisartuni ilaasortat Inuit ataqatigiinneersut Múte B. Egede aamma Stine Egede qujaffigissavassi, inatsisartunut aalajangiiffigisassatut siunnersuuteqarnissinnut soqutigintartunut, imatullu naatsumik Atassut-miit oqaaseqarfigissavagut.

Siullermik Naalakkersuisut upissutilaarusuppakka. Tusakuluttuarparput siunnersuuteqartoqartillugu, Naalakkersuisut nalunaarusiortoqarnissaannik peqquneqarpata, piaartumik iliuuseqartariaqartoqartariaqartoq periusissanik nalunaarusiassanilluunniit pineqartillugit, ilaatigut siunnersuuteqartut partiivineersut tunuarsimaartanngeqaasi. Aap nikittaattumik naalakkersuisooqataasarnigut inatsisartullu aalajangersimasaat aallaavigineqartarmat innersuussutiginnassavara. Nuannarigaanni nuanniigigaluaannilu tamanna qinikkatut pisinnaatitaaffiunera ilisimavarsi, aatsaalli inatsisartuni suleriaatsip allanngortinnissaanik Atassut-ip oqariartuutiguakkagut naleqqussarneqarpata, paaseqatigiinneq pitsaanerulersinneqarnissaa qularutissaanngilaq.

Imminut pilersornerulernissatsinnik, najukkanilu nunalerinikkut tunisassiarineqarsinnaasunik siuarsarusulluta ukiorpanngortuni inatsisartuni qaqqinneqartartut isummorsorfigiinnarnagit aamma ataatsimiitaliani susasaqartuni ila qasseriartutamitaava, ilaatigut kujataanut savaatilikkormiunut angalasarpugut pissarsiffigilluartakkatsinnik.

Atassut-miit oqariartaasitta ilagaat, pinngortitaq aqussinnaanngilarput, taamattorli pinngortitap allanngorartuutut periarfissarititaasut ilaatigut qulaani siunnersuuteqartut oqariartuutaanut naleqqussarfigissallugit politikikkut aqutissiuussuuartariaqarnerput pisariaqarluinnqartoq isumaqataavugut.



Qangamut sanilliuni kiannerusalenera ilutigalugu, savaatikkormiut savanik nioqquissiornerata saniatigut, qujanaqisumik naatitanik assigiinngitsunik tunisassiorsinnaanerat tapersorsorluinnakkatsinnut ilaavoq, sulilu tamanna attapparput. Taamaattorli savaatilli nunaatillilluunniit, pisortat ingerlataanniittuni, nioqquissanik pisisartunut apuussiniarnermi akinut tunngasuinnaanngitsut, tunisassialli pitsaasuunissaanik aporfeqartoqartarnera pillugu iluarsiiisoqarnissaanik oqariartuuteqartarnerput susassaqtunut apuussorneqartarput. Pikkorissiarporput sulili avammut unammillersinnaalluassagutta annertunerujussuarmik suliassaqtarnerput nassuerutigisarparput.

Naalackersuisut siunnersuuteqartunut akissutaasoq pillugu annerusumik oqaaseqarfiginagit Atassut-miit tapersiivugut, suliniutinummi ingerlareersunut peqataaffiguarsimasatsinnut oqaaseqaatigisartakkatsinnullu innersuussiinnassaagut. Taamatut naatsumik oqaaseqarluta, siunnersuuteqartut tamakkiisumik taperserlugit suliap aappassaaneerreqartigani aalisarnermut nunalerinermullu ataatiimiitaliami peqqissaarullugu suliareqqaarneqarnissaa Atassut-miit akuersissutigaarput.